



Datë: 10.11.2025
Numër Protokolli: 7260/2025

A.nr.1773/2025

Këshilli i Pavarur Mbikëqyrës për Shërbimin Civil të Kosovës-Kolegji për Shqyrtimin dhe Vendosjen e Ankesave në përbërje nga: Ardita Haxhnikaj Demi, kryetare, Eshref Shabani dhe Malsore Gashi Bajraktari, anëtarë, me Avdyl Bekteshi, në cilësinë e procesmbajtëses, bazuar në Aktgjykimin A.nr.698/2024 të datës 08.09.2025 të Gjykatës Themelore në Prishtinë-Departamenti për Çështje Administrative, ka rishqyrtuar ankesën me numër A.nr.0812/2023, të datës 14.11.2023, të parashtruar nga ankuesi D.H të cilin me autorizim e përfaqëson Valentina Kaçandolli Bekteshi nga Prishtina, kundër organit të punësimit Ministria e Punëve të Brendshme, në çështjen juridike “*kërkesë nga marrëdhënia e punës*”, duke vepruar në pajtim me nenin 6, paragrafin 1, nenin 16 paragrafi 3 dhe nenin 18, paragrafin 1, nën paragrafin 1.2 dhe 1. 6 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, me datë 10.11.2025, njëzëri mori këtë:

V E N D I M

I. Aprovohet si e bazuar ankesa me numër A.nr.1408/2023, e datës 14.11.2023, e parashtruar nga ankuesi D.H.

II. Anulohet Akt Emërimi AE. Nr.10/2023, i datës 11.10.2023, për pozitën Zyrtar për pritje dhe akomodim në Departamentin për Shtetësi, Azil dhe Migracion/Qendra e Pritjes së Përkohshme Vranidoll, në Ministrinë e Punëve të Brendshme, *dhe çështja kthehet në rishqyrtim dhe rivendosje të organi i njëjtë.*

III. Obligohet Sekretarja e Përgjithshme e Ministrisë së Punëve të Brendshme që brenda afatit prej pesëmbëdhjetë (15) ditësh nga dita e pranimit të këtij vendimi, të ndërmarrë të gjithë veprimet e nevojshme me qëllim të zbatimit të këtij vendimi sikurse në pikën II të këtij dispozitivi.

IV. Këshilli i Pavarur Mbikëqyrës për Shërbimin Civil të Kosovës, duhet të njoftohet me shkrim pas ndërmarrjes së veprimeve në pajtim me këtë vendim.

A r s y e t i m

Ankuesi D.H (*tutje vetëm ankuesi*), më datë 14.11.2023, ka parashtruar ankesë në Këshillin e Pavarur Mbikëqyrës për Shërbim Civil të Kosovës, kundër Akt Emërimi AE. Nr.10/2023, të datës 11.10.2023, me pretendimin ankimor që të shfuqizohet i njëjti dhe ankuesi të sistemohet në një pozitë në bazë të përgatitjes profesionale sipas Marrëveshjes për Bursë numër protokolli 1597, të datës 13.10.2008 2008-2012 dhe Aktgjykimit AC.nr.4309/2022, të datës 30.05.2023, të Gjykatës së Apelit.

Këshilli i Pavarur Mbikëqyrës për Shërbimin Civil të Kosovës (*me tej Këshilli*), bazuar në Rregulloren Nr.02/2018 për Procedurën e Shqyrtimit dhe Vendosjes së Ankesave, më datë 17.11.2023, ka proceduar kërkesën për përgjigje në ankesë të Ministria e Punëve të Brendshme, ndërsa, kjo e fundit më datë 01.12.2023. ka përcjell shkresat lidhur me çështjen në procedurë të vendosjes.

Kolegji për Shqyrtimin dhe Vendosjen e Ankesave ka administruar këto prova: Ankesën me numër protokolli 6970/2023 të datës 14.11.2023 të parashtruar nga ankuesi në Këshillin e Pavarur Mbikëqyrës për Shërbimin Civil të Kosovës; Autorizimin e datës 10.11.2023; Akt Emërimin AE.Nr.10.2023 të datës 11.10.2023; Shkresë nga Drejtori e Akademisë Policore/Fakulteti i Shkencave të Sigurisë; Diplomën e datës 28.01.2015; Aktgjykimin C.nr.7443/2021 të datës 26.01.2022 të Gjykatës Themelore në Prishtinë-Departamenti i Përgjithshëm, Divizioni për Çështje Civile; Aktgjykimin AC.nr.4309/2022 të datës 30.05.2023 të Gjykatës të Kosovës; Kërkesën për përgjigje në ankesë e datës 17.11.2023; Përgjigjen në anesë e datës 01.12.2023; Përshkrimin e detyrave të punës Zyrtar për Pritje dhe Akomodim; Marrëveshjen për Bursë 2009-2013 e lidhur mes Ministrisë së Punëve të Brendshme dhe ankuesit; Vendimin e datës 31.05.2022 të Ministrisë së Arsimit, Shkencës, Teknologjisë dhe Inovacionit; Pasqyrën nga trusti për ankuesin periudha 15.05.2019 deri 17.10.2023; Njoftimin KMLC.nr.90/2023 të datës 01.08.2023 nga Zyra e Kryeprokurorit të Shtetit; Emailin e datës 21.11.2023 nga A.G për anketuesin; Emailin e datës 13.11.2023 nga ankues për A.G; Organogramin e Ministrisë së Punëve të Brendshme; Rregulloren (ZKM) Nr.03/2023 për Ndryshimin dhe Plotësimin e Rregullores(ZKM) Nr.01/2021 për Organizimin e Brendshëm dhe Sistematizimin e Vendeve të Punës të Ministrisë së Punëve të Brendshme; Aktgjykimin A.nr.698/2024 të datës 08.09.2025 të Gjykatës Themelore në Prishtinë-Departamenti për Çështje Administrative.

Kolegji i Këshillit duke u bazuar në vlerësimin e hollësishëm të çdo prove veç e veç dhe të gjitha provave të marra së bashku, si dhe bazuar në rezultatin tërësor të shqyrtimit administrativ, konstatoi së ankesa e ankuesit është e bazuar, **dhe çështja kthehet në rishqyrtim dhe rivendosje të organi i njëjtë, sepse:**

Nga administrimi i provave materiale rrjedhë se Ministria e Punëve të Brendshme (tuje MPB), bazuar në ofertën e Ambasadës Turke të datës 27.08.2008, që të pranoj pesë zyrtarë policore të Kosovës, për studime në Fakultetin e Shkencave të Sigurisë të Turqisë, më datë 13.10.2008, kishte lidhur marrëveshje me ankuesin si përfitues i bursës, me kushtin që ankuesi pas studimeve të kthehet në Kosovës dhe të punoj për MPB apo në institucionet pasardhëse. Rrjedhimisht sipas Marrëveshjes për Bursë, 2009-2013, pika 2. nën pika 2.1 ishte përcaktuar së MPB-ja ose cilido paraardhës i saj, menjëherë pas marrjes së dëshmisë për përfundimin e studimeve, duhet ti ofroj përfituesit kontratë të rregullt pune në kuadër të MPB, agjencive të saj (Policisë së Kosovës) dhe jo më vonë së tre muaj kalendarik pas marrjes së dëshmisë, për një periudhë prej së paku 10 vitesh. Vendi i punës do të përcaktohet duke u bazuar në organizmin e brendshëm të MPB-së-Policisë së Kosovës apo pasardhësve të saj.

Ankuesi kishte paraqitur dokumentacionin për punësim në Ministrinë e Punëve të Brendshme, në pajtim me Marrëveshjen për Bursë të datës 13.10.2008, mirëpo, që kjo e fundit nuk kishte ofruar ndonjë vend pune për ankuesin. Ankuesi, se bashku me gjashtë (6) paditës të tjerë, ka parashtruar padi në Gjykatën Themelore në Prishtinë-Departamenti i Përgjithshëm-Divizioni për Çështje Civile, për shkak të mos zbatimit të marrëveshjeve për bursë të datës 13.10.2008. Rrjedhimisht, Gjykata Themelore në Prishtinë – Departamenti i Përgjithshëm, Divizioni për Çështje Civile, me Aktgjykimin C.nr.7443/2021 të datës 23.12.2021, ka aprovuar kërkesëpadinë e paditësve, në këtë rast ankuesit, duke detyruar të paditurën Ministrinë e Punëve të Brendshme që marrëveshjen e lidhur me datë 13.10.2008 të nënshkruar nga palët ndërgjyqësore për secilin paditës të përmbushë detyrimet e veta nga këto marrëveshje, paditësve të ju ofrojë kontrata të rregullta pune, sipas përgatitjes shkollore sipas pikës 2.1 të marrëveshjes, aktgjykim i cili ishte vërtetuar nga Gjykata e Apelit me aktgjykimin AC. Nr.4039/2023 të datës 30.05.2023.

Ministria e Punëve të Brendshme, më datë 11.10.2023 ankuesit i ka lëshuar Aktin e Emirit me numër AE. nr.10/2023 dhe numër të protokollit 1074/2023 të datës 12.10.2023, duke sistemuar ankuesin në pozitën *Zyrtar për Pritje dhe Akomodim*. Ankuesi, duke vlerësuar së pozita në fjalë nuk përkon me kualifikimet e tij shkollore, me datë 14.11.2023 parashtron ankesë në Këshillin e Pavarur Mbikëqyrës për Shërbimin Civil të Kosovës, më pretendimin që sistemi i ankuesit sipas Akti të Emirit me numër AE. nr.10/2023, nuk është në harmoni me vendimin e gjykatës së apelit, përgatitjes shkollore dhe titujve të fituar në studime si specialist i sigurisë. Këshilli i Pavarur Mbikëqyrës për Shërbimin Civil të Kosovës më Vendimin A.nr.1408/2023, të datës 12.01.2024 kishte hedhe poshtë si të pas afatshme ankesën e ankuesit.

Ankuesi kundër vendimit të KPMSHCK-së, kishte hapur konflikt administrativ pranë gjykatës kompetente, ndërsa Gjykata Themelore në Prishtinë-Departamenti për Çështje Administrative, më datë 08.09.2025 përmes Aktgjykimin A.nr.698/2024, ka aprovuar kërkesëpadinë e palës paditësit në këtë rast ankuesit duke anuluar Vendimin A.nr. 1408.2023 të KPMSHCK-së dhe duke e kthyer çështjen në rishqyrtim dhe rivendosje.

Kolegji i Këshillit marr parasysh konstatimet e dhëna nga Gjykata Themelore në Prishtinë-Departamenti për Çështje Administrative përmes Aktgjykimit A.nr.698/2024 të datës 08.09.2025, ka rishqyrtuar ankesën e ankuesit dhe ka konstatuar se ankesa e ankuesit është e pranueshme në kuptim të kuptim të dispozitave të nenit 127 ndërlidhur me nenin 129 të Ligjit Nr.05/L-031 për Procedurën e Përgjithshme Administrative(tutje LPPA) gjegjësisht, ankesa është ushtruar brenda afatit ligjor të përcaktuar me nenin 127 paragrafi 3 të LPPA-së pasi që akti i kontestuar nuk ka përmbajt informacion për këshillë juridike, dhe së ankuesi ka legjitimitetin e palës në procedurë.

Ndërsa, në kuptim të bazushmërisë së pretendimeve ankimore Kolegji ka analizuar provat materiale të çështjes, dhe si rrjedhojë konstatoi se Gjykata Themelore Departamenti i Përgjithshëm, Divizioni për Çështje Civile, me Aktgjykimin C.nr.7443/2021 të datës 23.12.2021, i plotfuqishëm sipas Aktgjykimit AC. Nr.4039/2023 të datës 30.05.2023, të Gjykatës së Apelit, ka detyruar të paditurën Ministrinë e Punëve të Brendshme që të përmbushë detyrimet e veta sipas marrëveshjeve të lidhura me datë 13.10.2008 e të nënshkruar nga palët ndërgjyqësore dhe së paditësve të ju ofrojë kontrata të rregullta pune, sipas përgatitjes shkollore sipas pikës 2.1 të marrëveshjes. Kështu që nisur nga fakti së vendimet gjyqësorë të formës së prerë të nxjerra në procedurë kontestimeve janë të detyrueshme për palët ndërgjyqës siç përcaktohet me nenin 167 të Ligjit Nr. 03/L-006 Për Procedurën Kontestimore,

Kolegji i Këshillit në kuadër të autorizimeve kushtetuese dhe ligjore lidhur me sigurimin e respektimit të rregullave dhe parimeve që rregullojnë shërbimin civil, ka trajtuar pretendimet ankimore të ankuesit, vetëm në kuptimin e sistemit të ankuesit në pozitën e nëpunësit civil në pajtim me pikëpamjet juridike si në aktgjykim C.nr.7443/2021 të datës 23.12.2021, të Gjykatës Themelore në Prishtinë. Andaj, mbi këtë bazë, Kolegji ka shqyrtuar përkrahimin e detyrave të punës për pozitën *Zyrtar për pritje dhe akomodim* në Qendrën e Pritjes së Përkohshme për Emigrantë, Ministria e Punëve të Brendshme, ku si kriteret për këtë pozitë të punës janë vendosur:

Arsimi: diplomë e arsimit të lartë, se paku 3 vite të studimeve në fushën e paspecifikuar; **Përvoja:** së paku një vit përvojë pune profesionale, dhe si rrjedhojë në vlerësimin e Kolegjit sistemi i ankuesit në pozitën e punës Zyrtar për pritje dhe akomodim, nuk është në përputhje me përgatitjen arsimore të ankuesit.

Për sa me sipër, Kolegji i Këshillit bazuar në nenin 6 paragrafi 1, nën paragrafi 1.1 si dhe nenin 18 paragrafi 1 nën paragrafi 1.2 dhe 1.6 të Ligjit Nr.06/L-048 për Këshillin e Pavarur e Pavarur Mbiqyrës për Shërbimin Civil të Kosovës si dhe praktikën e vendosur sipas Vendimit A.nr.1412/2023 të datës 28.12.2023 për objektin e njëjtë, aprovoj ankesën e ankuesit si të bazuar, anuloi Akt Emërimit AE. Nr.10/2023, të datës 11.10.2023, për pozitën Zyrtar për pritje dhe akomodim dhe çështjen e kthej në rishqyrtim të organi i njëjtë, rrjedhimisht me detyrimin që ekretarja e Përgjithshme e Ministrisë së Punëve të Brendshme në ri procedurë duhet të rishqyrtoj çështjen e sistemit të ankuesit në mënyrë që i njëjti të sistemohet në pozitë të punës sipas përgatitjes së tij shkollorë ashtu siç është përcaktuar edhe nga Gjykata Themelore në Prishtinë me aktgjykimin C.nr.7443/2021 të datës 23.12.2021.

Këshillë juridike: Vendimi hyn në fuqi ditën e nënshkrimit nga Kryetarja e Kolegjit. Pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë–Departamenti për Çështje Administrative, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalin ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS

Lënda me numër A.nr.1773/2025

Avdyl BEKTESHI

Procesmbajtës

Ardita Haxhnikaj-Demi

Kryetare e Kolegjit

Vendimi i dërgohet:

- Përfaqësueses së ankuesit znj. Valentina Kaçandolli Bekteshi;
- Znj. Valbona Gjonbalaj, gjyqtare në Gjykatën Themelore në Prishtinë
Departamenti për Çështje Administrative;
- MPB: Sekretares së Përgjithshme dhe Udhëheqësit të Personelit;
- Arkivit të KPMSHCK-së